

# La'ó Hamutuk

## Institutu Timor-Leste ba Monitoriza no Analiza Dezenvolvimentu

Rua. D. Alberto Ricardo, Bebora, Dili, Timor-Leste

Tel: +670 3321040 no +670 77234330, email: [laohamutuk@gmail.com](mailto:laohamutuk@gmail.com) Website: [www.laohamutuk.org](http://www.laohamutuk.org)



Dili, 15 Juñu 2020

Bodik ba : Exelénsia Deputadu/a \_\_\_\_\_  
Iha : Uma Fukun Parlamentu Nasionál Timor-Leste  
Asuntu : Knaar foun ba Parlamentu, inklui Lei Defamasaun

Ba Distintu Deputadu/a sira mak ami respeita,

La'ó Hamutuk nudár organizasaun sosiedade sivíl nasionál ne'ebé mak hala'ó nia knaar halo peskiza, analiza, advokasia no tau matan ba polítika estadu nian no polítika husi Instituisaun internasionál sira liga ho prosesu dezenvolvimentu iha Timor-Leste. Nune'e bele fasilita komunikasaun entre povu no nia ukun na'in sira atu bele ezije katak povu mak sai autór ba sira nia prosesu dezenvolvimentu iha Timor-Leste.

Ba dala uluk ami agradece ba Distintu Deputadu/a sira iha uma fukun Parlamentu Nasionál ne'ebé durante ne'e nafatin fó espasu no oportunidade ba ami nudár sosiedade sivíl iha Timor-Leste hodi bele partisipa no mós hato'ó ami nia hanoin liu husi audiénsia públika no mós assiste iha debate plenária ba lei importante sira ne'ebé ita boot sira estabelese no mós ezbosu proposta lei husi governu, ami espera katak oportunidade no kolaborasaun ida ne'e sei kontinua nafatin iha futuru hafoin re-estruturasaun foun ba Distintu Deputadu/a sira iha uma fukun Parlamentu Nasionál.

Tuir Konstituisaun RDTL artigu 92, define katak "Parlamentu Nasionál mak órgaun soberania Repúblika Demokrátika Timor-Leste ne'ebé representa Timoroan tomak, iha kbiit atu halo lei, fiskaliza no atu halo desizaun polítika ba nasaun nian. Mandatu no knaar konstituisiónál ne'e ami husu atu Distintu Deputadu/a sira tenke implementa ho di'ak no kuidaun hodi tane aas interese povu no nasaun tomak duké interese grupu no partidáriu. La'ó Hamutuk kontente no prontu atu servisu hamutuk ho Ita-Boot sira hodi apoiu no diskute informasaun no analiza sira atu bele ajuda Ita-Boot sira atu halo desizaun ne'ebé bele promove dezenvolvimentu sustentável no ekitável iha rai doben ida-ne'e.

Ami mós rekoñese katak durante ita nia estadu hasoru problema impase polítiku, hafoin Orsamentu Jerál Estadu 2020 la pasa iha Parlamentu Nasionál, kontinua ho implementasaun estadu emerjénsia ba surtu COVID-19 liu husi Dotasaun Orsamentu Temporáriu (DOT) ne'ebé fó efeitu boot ba implementasaun programa VIII governu nian ladún la'ó ho efetivu, ikus mai fó mós implikasaun boot ba efetividade servisu Distintu Deputadu/a sira nian liu-liu atu kontinua debate lei importante sira hanesan Lei Anti Korrupsaun no lei sira seluk ne'ebé seidak hetan aprovasaun final iha Parlamentu Nasionál.

Ami mós husu Parlamentu Nasionál atu labele autoriza Konsellu Ministru atu altera Kódigu Penal hodi kriminaliza defamasaun ne'ebé daudaun ne'e sai polémika iha públika no elabora hela husi Ministériu Justisa. La'ó Hamutuk hanoin lei ida ne'e sei hakanek ita nia demokrasia no mós kontradís ho Konstituisaun RDTL iha Artigu 40, ne'ebé ko'alia kona ba liberdade espresaun no informasaun, no mós, artigu 41, ne'ebé ko'alia kona-ba liberdade imprensa no meius komunikasaun sosiál seluk.

Bele haree informasaun detallu liu iha submisaun husi La'ó Hamutuk ne'ebé ba Ministériu Justisa semana kotuk ne'ebé aneksu ba karta ne'e no mós iha pájina web La'ó Hamutuk nian:

<http://www.laohamutuk.org/Justice/defamation/2020/20DefamLaw.htm> .

Nudár representante povu iha uma fukun Parlamentu Nasionál Ita-Boot sira tenke konsidera prosesu

konsultasaun públiku ne'e sai dalan importante iha faze estabelesimentu ezbosu lei ruma, ka simu proposta lei husi governu nune'e partisipasaun husi comunidade, grupu vulneravel sira hanesan feto no ema ho defisiénsia sira bele hola parte iha prosesu ida ne'e ho di'ak, atu nune'e bele asegura katak lei sira ne'ebé Ita-Boot sira prodús no aprova sei a favor ba direitu povu mukit no ema vulneravel sira.

Nudár órgaun fiskalizador ba implementasaun polítika no programa governu nian, ami kontinua enkoraja Ita-Boot sira atu rekoñese Timor-Leste nia situasaun ekonomia ohin loron ne'ebé depende maka'as liu ba iha setór petróleu, tenke konsidera mós katak Timor-Leste nia rezerva mina no gas iha kampu Bayu-Undan sei maran iha tempu besik.

Aleinde ne'e problema surtu COVID-19 ne'ebé mós fó impaktu global ba merkadu finanseiru no presu mina iha merkadu mundiál tenke sai pergunta boot ba Ita-Boot sira atu konsidera se bainhira governu atuál kontinua promove no tau investimentu orsamentu boot liu tan ba setór petróleu inklui projetu boot Tasi Mane nian no projetu boot sira seluk. Situasaun ida ne'e nudár dezafiu boot ida ne'ebé ita nia nasaun hasoru ohin loron, problema seluk ne'ebé tenke konsidera mós mak ita nia investimentu iha setór produtivu sira ne'ebé kontinua mukit no número dezempregu kontinua aas kada tinan, número kiak ne'ebé as, mal nutrisaun no problema sosiál sira seluk.

Tan ne'e La'ó Hamutuk sujere ba Distintu Deputadu/a sira atu kontinua ezije ba governu hodi halo polítika sira ne'ebé realistíku atu bele diversifika ita nia ekonomia ba investimentu ne'ebé dura no sustentável, liuliu investimentu iha setór produtivu sira hanesan agrikultura, indústriá ki'ik sira no turizmu. Tenke hasa'e kapasidade povu sira nian liu husi hadi'a setór servisu báziku sira hanesan saúde, bee mós no edukasaun atu nune'e bele garante katak ita-nia dezenvolvimentu ekonómiku sei sustentável, atu bele rezolve problema kiak, malnutrisaun, dezigualdade sosiál, dezigualdade jéneru, liberdade espresaun no fornese seguransa umanu.

Ikus liu ami konsiente katak Parlamentu Nasionál nudár órgaun soberanu ida ne'ebé hala'o nia knaar hodi garante estadu direitu demokrátiku, bazeia ba Konstituisaun RDTL, Artigu (1.1) katak Estadu ida ne'ebé demokrátiku, soberanu no respeita ba dignidade ema ida-idak nian, (2. 2) Estadu hakru'uk ba lei inan no lei oan sira, no (6 (b)) Garante no promove sidadaun sira nia direitu fundamentál, no respeitu estadu nia prinsípiu direitu demokrátiku. Nune'e La'ó Hamutuk nia servisu nudár parte ida hodi kontribui ba dezenvolve rai ida ne'e atu tane aas valores demokrasia, respeita lei no prinsípiu direitus umanus ema hotu nian iha nasaun Timor-Leste.

Mak ne'e de'it ami nia karta ba Ita-Boot sira, ba Ita-Boot sira nia servisu hamutuk ami hato'o obrigadu wa'in.

Ami mak saran lia,

Marta da Silva

Adilsonio da Costa Junior

**Reprezenta Ekípa Peskizadór/a La'ó Hamutuk:** Bree Ahrens, Celestino Pereira Gusmão, Maximus Tahu, Charles Scheiner, Berta Antonieta, Eliziaria Febe Gomes no Mariano Ferreira

Kópia ba: Media, Pájina-web